

四庫全書

史部

欽定四庫全書

明會典卷十三

吏部十二

諸司職掌

在京未入流品衙門吏攢滿日於九品衙門吏員內
用

九品衙門吏攢滿日於八品衙門司吏七品衙門典吏
內用

八品衙門司吏七品衙門典吏滿日於七品衙門書吏
六品衙門典吏內用

七品衙門書吏滿日於五品衙門司吏內用

六品衙門司吏滿日於五品衙門司吏內用

五品衙門典吏滿日於五品衙門司吏四品衙門典吏
內用

五品衙門司吏滿日於四品衙門司吏三品衙門典吏
內用

四品衙門典吏滿日於四品衙門司吏三品衙門典吏
內用

四品衙門司吏滿日於三品衙門令史胥吏二品衙門
典吏內用

三品衙門典吏滿日於三品衙門令史胥吏二品衙門
典吏內用

三品衙門令史胥吏滿日於二品衙門令史一品衙門
典吏內用

二品衙門典吏滿日於二品衙門令史一品衙門典吏
內用

二品衙門令史滿日於一品衙門掾史對品衙門都吏
內用都吏滿日於一品衙門提控內用

一品衙門典吏滿日於對品衙門掾史內用掾史滿日
於對品衙門提控內用

在外大小衙門典吏不許陞轉三十六箇月考滿給由
赴京聽用

事例

詳見驗封司

諸司職掌

凡除授過官員開寫年籍鄉貫住址脚色貼黃通類具
奏赴內府用寶附貼如有陞調改降官員續附轉貼及
本部選部考功付并各衙門開到官員事故明白下落
緣由通類具奏開揭如無的確下落行移該問及原任
衙門照勘明白以憑施行

事例

凡續附貼黃每月一次具奏年終類進內庫收貯

諸司職掌

凡事故官員照依揭下貼黃於事故冊內類姓開寫年籍脚色鄉貫住址歷任俸月過名及事故下落緣由以憑存照

諸司職掌

凡內外官吏人等例合丁憂者務要經由本部京官具奏關給內府孝字號勘合吏典人等劄付應天府

在京
劄付

順天
府

給引照面在外官吏人等移文知會所在官司給
引回還除祖父母父母承重丁憂外期年喪服不
許守制及移文原籍官司體勘明白開寫是否承
重祖父母及嫡親父母取具官吏里鄰人等結罪
文狀回報如有詐冒就便解部仍以聞喪月日為
始不計閏二十七月服滿起復若有過期不行移
文催取到部果無事故在家遷延者咨送法司問
罪

明令

凡官吏丁憂除公罪不坐外其犯贓罪及係官錢糧依

例勾問

事例

凡官吏守制服滿定限赴部在京北直隸四個月河南山東六個月山西陝西浙江江西湖廣南直隸八個月福建兩廣貴州四川十箇月雲南一年此外違限二箇月之上叅問

凡在京堂上官丁憂具奏給與孝字號勘合司屬以下
官并太醫院醫士舊例類引奏請 弘治元年奏准不引
官闕勘合醫士送順天府給引南京堂上官丁憂親自
赴京奏給勘合司屬以下官本部以勘合發南京吏部
填給起復齋赴本部類繳其吏負人等各給引如舊在
外官吏俱從所在官司放回併申本部 洪武十九年
令欽天監官不守制後許奔喪三箇月 二十六年令
倉官放糧支未絕聞父母喪者交盤付見任官吏方

許守制 二十八年令陰陽醫學官丁憂起復就彼復
職世襲土官在職守制 三十五年令太常寺官雖由
樂舞生出身聞父母喪亦許回原籍守制 永樂元年
令王府官父母歿於任所者回原籍守制太醫院官及
醫士有父母歿葬於京城外者許依墳守制 正統七
年令官吏匿喪者俱發原籍為民 十二年令内外大
小官員丁憂者不許輒便保奏奪情起復 天順二年
令官吏以舊喪詐作新喪者發順天府昌平遵化薊州

等處為民係順天府者發口外為民若父母見在詐稱
死亡者發口外獨石等處充軍其聞父母喪匿不舉哀
不離職役者原籍三千里之上限一年不及者限半年
過限者發口外隆慶永寧等處為民 成化十五年令
詐匿喪官員所在官司容情起送或因他事發覺正犯
悉照見行事例發落經該官吏以枉法從重論 弘治
三年令官吏未滿接服守制不行申報及扶同官吏究
問若稱已行申報中途沉滯者官員監生不許附選吏

典不許實撥俟行查至日定奪

凡京官公差養病在外丁憂不給勘合及相繼丁憂不以勘合并官司申文赴部改填或勘合遭風水濕無告官明文者俱問罪

凡官吏丁憂月日多少者問罪例限外違限二箇月者問罪如患病既痊後水程違限二箇月者及患病二年之上雖有文憑者亦問罪文移不開父母病故并聞喪服滿月日及那移洗改月日者稱病不開得患與痊疴

日期及無所在官司印信明文者俱問罪

凡為事問革考察退任詐稱丁憂起復者發口外為民
扶同起送官吏以枉法論

凡官吏監生丁憂起復給批違限一年之上送問行查
或限內限外為事無招雖有招開還職役不明或長孫
承重不開父故年月及有無伯兄或丁養父母憂不開
自幼過房或咨申不粘原籍官吏人等執結者俱行查
凡巡檢倉庫等官丁憂去任不告給上司明文王府官

丁憂不告給長史司明文辦事官吏在部丁憂回家十年之上起復兩考役滿吏七年之上起復到部者俱行查近例令各王府儀賓凡遇父母之喪徑自啓王不分原籍遠近暫令前去奔喪量程遠近定與假限事畢依期回還仍須各王隨為具奏

舊制官員致仕隸本司掌行後歸考功司

諸司職掌

凡官員年七十以上若果精神昏倦許令親身赴京面

奏如准本部查照相同方許去官離職

事例

見考功司

諸司職掌

凡官員父母年七十之上許令移親就祿侍養如果父母老疾去官路遠戶內別無以次人丁者方許親身赴京面奏揭籍定奪及吏貲人等父母年老別無人丁者務要經由本部移文體勘是實明白奏准方令離役俱候親終服滿起復赴部聽用

諸司職掌

凡官吏人等或年幼過房乞養欲復本姓者經由本部
移文原籍官司體勘是實及官幼名改諱具奏改正貼
黃仍行知會移咨戶部改附籍冊吏員人等幼名改諱
者移文本部准改

事例

洪武三年詔蒙古色目人入仕後或多更姓名歲久子
孫相傳昧其本源如已更易者聽其改正 又令官吏

人等名字有天國君臣聖神堯舜禹湯文武周漢晉唐等國號相犯者悉更之 又令官吏人等奏告更名復姓若自幼過房乞養或入贅與人因從外姓報入戶籍外姓係軍匠竈戶而本姓係民者不許改復 十九年詔軍民并吏胥人等敢有更名易諱及兩三名字被人告發家財給賞告人本身處死家口遷發化外

諸司職掌

凡本部官吏人等俸給每月初間明白立案及帶支衙

門將實支官吏姓名同該支米數造冊赴部劄付該部
官員放支仍將實支米數回呈立案

諸司職掌

凡本部合用印色支銷盡絕移咨工部轉行該庫放支
事例

洪武間凡本部合用印色每年約用紫粉斤數具呈本
部赴戶科關領外承字號勘合前去戶部比號相同附
寫底簿明白就齎勘合赴內府外承運庫比號相同照

數關領回部應用仍將支過數目回呈本部立案備照
後奏准於順天府官錢內具奏支給買用

諸司職掌

凡本部合用紙劄移咨刑部於贓罰鈔內關支價鈔買
用明白立案開銷以憑稽考

事例

洪武間凡紙劄每季各司會計合用數目明白開附本
司案呈本部填寫實支數目具手本赴戶科關領乙字

號勘合赴戶部比號相同附寫底簿齎勘合赴內府乙
字庫照數關領回部應用支銷盡絕明白花銷立案備
照後奏准於刑部都察院見收囚人紙劄內具奏關用



明會典卷十三

欽定四庫全書

史部

明會典卷十四

詳校官編修_臣裴謙

編修_臣程嘉謨覆勘

總校官知縣_臣繆琪

校對官中書_臣高 中

謄錄監生_臣朱上林

欽定四庫全書

明會典卷十四

吏部十三

考功清吏司

諸司職掌

郎中員外郎主事掌文職官吏之考課

考覈官吏見於諸司職掌者若京官試職有司官遇缺
借除之類後事例多不同今備載之

諸司職掌

一凡在京六部太常司光祿司通政司太理寺國子監太僕寺欽天監翰林院太醫院儀禮司屬官五軍都督府各衛軍職文官應天府首領官并所屬上元江寧二縣官俱從本衙門正官考覈應天府五品以下官監察御史從都御史考覈給事中從都給事中考覈東宮官王府官尚寶司中書舍人都給事中儀禮司行人司正官從本衙門將該考官員行過事蹟并應有過犯備細開寫送本部考覈

欽天監翰林院太醫院正官都御史試職實授頒給誥勅
取自上裁其有特恩實授給與誥勅者不拘此例

一凡在京官初入仕者且令試職一年後考覈堪用者
與實授不堪用者降黜量才錄用其在任未經考覈試
職官遇有調除仍於本衙門及別衙門本等職事內用
通理月日降除及對品改除者止理見任月日俱候一
年照例考覈或有為事釋免再任除授者試職照例考
覈

一凡六部五品以下官太常司光祿司通政司大理寺
國子監太僕寺欽天監翰林院太醫院儀禮司屬官歷
任三年聽於本衙門正官察其行能驗其勤惰從公考
覈明白開寫稱職平常不稱職詞語送監察御史考覈
本部覆考其在京軍職文官俱從監察御史考覈各以
九年通考其四品以上官員任滿黜陟取自上裁其在
外有司官員三年考滿給由到京考覈平常稱職者遇
缺借除京官亦以九年通考若行人司行人以一年為

滿從本司正官考覈分豁稱職不稱職呈送禮部轉送
本部覆考稱職者於從九品內陞用不稱職者於未入
流品官內叙用有過罰差一年儀禮司序班在職一年
本司考覈堪用不堪用送禮部轉行本部覆考堪用請
旨實授不堪用黜降若三年考滿俱發監察御史考覈
送本部覆考但係一應京官三年考滿具奏俱於在京
對品內調用

一凡通政司光祿司翰林院尚寶司給事中中書舍人

東宮官俱係近侍官負監察御史係耳目風紀之司太醫院欽天監及王府官不係常選任滿黜陟取自上裁一凡在京五品以下官俱令試職候一年後考覈定奪比先除授已經試職一年二年之上及已實授一年二之上者一例考覈試職堪任用者與實授及已實授堪任用者俱給與誥勅三年考滿許請封贈其試職及已實授而不堪任用者一體黜降其有經考滿復任者不必再考頒給誥勅聽請封贈已入流倉官不須試職候

一年任滿給與勅命守支未入流品官員俱與實授不給勅命以上付發司封具奏頒給施行

事例

凡在京官洪武初三年一調用二十九年始以九年為滿三十年定考覈署事官員等第勤慎者仍治其事實授在任三月才力不逮者奏請黜降 弘治元年令兩京各衙門屬官考滿堂上官出與考語送都察院并吏部覆考如原來考語得當續出考語不嫌雷同不當聽

覆考官從公考覈平常者引奏復職有贓者罷黜為民
其有前考平常後能懲艾勉於為善者亦宜書稱前考
稱職後或放肆改節者亦書平常以憑黜陟

凡在京堂上正佐官三年六年考滿不停俸在任給由
不考覈不拘負數引至御前奏請復職永樂元年奏准
太僕寺光祿寺通政司大理寺國子監鴻臚寺翰林院
五品以下堂上官照例不考五年奏准詹事府六品以
上官照太常寺等官例亦不考俟九年奏請黜陟南京

堂上官考滿日停俸赴京給由其年七十以上例應致仕者皆不引奏特具本奏請取自上裁

凡各處巡撫都御史三年六年考滿移咨到部具奏復職仍行本官知會

凡欽天監官考滿洪武四年奏准職司天文比與常選人員不同不准考滿三十五年令欽天監正佐官俱不考覈今大小官員俱照例考滿

凡各科給事中考滿正統二年奏准本科如無都給事

中許掌科給事中考覈

凡五府六部等屬官首領官行人司行人天地等壇長陵等陵官俱咨都察院劄付河南道考覈牒回覆考

凡兵馬司兵馬考滿先赴兵部考覈咨送本部行河南道覆考京縣管馬官亦咨兵部轉行太僕寺查馬數咨回本部發落

凡左右春坊司經局尚寶司六科給事中中書舍人神樂觀提點知觀考滿俱不咨都察院止本部考覈九年

考滿定該陞品級具奏取自上裁行人司司正司副亦止本部考覈

凡順天府治中通判推官三年六年考滿咨送都察院堂上官考覈咨回本部覆考

凡中書舍人九年考滿稱職成化四年奏准係進士舉人出身者陞員外郎監生出身陞主事乞恩報効出身陞寺副等官

凡在京衙門堂上官及監察御史調除外任雖品級相

等俸月不准通理其餘調外任者品級相等俱准通理
凡兩京所正所副所丞大使副使司獄等官俱例不考
覈查俸明白引奏復職九年考滿雖係事繁衙門止陞
一級

凡王府官及護衛首領官洪武三十年例不考覈

凡南京庫官周歲考滿戶部查錢糧明白送部入選

凡南京各衙門官員俱南京吏部都察院考覈停俸赴
京給由本部類引復職給憑還任成化二十二年奏准

六年考滿不赴京

凡在京官員三年六年考滿俱不停俸在任給由滿後三月無故不給由者叅問公差准理歷俸三十六箇月或三十七箇月俱准一考多歷少歷俱叅問

凡各帶俸官員本衙門查有相應員缺照該陞品級陞授如無亦陞各衙門相應職銜仍帶俸

凡內府各衙門工匠出身官員九年考滿成化十四年奏准俸職俱不陞

右在京官

諸司職掌

凡在外有司府州縣官三年考滿先行呈部移付選部作缺銓注司勲開黃仍令給由其見任官將本官任內行過事蹟功業文冊紀功文簿稱臣僉名交付本官親賫給由如縣官給由到州州官當面察其言行辦事勤惰從實考覈稱職平常不稱職詞語州官給由到府府官給由到布政司考覈如之以上俱從按察司官覆考

仍將考覈覆考詞語呈部直隸府州縣官考覈如前其
府官給由送監察御史考覈本部覆考類奏以上三年
考滿給由考覈平常稱職者於對品內別用不稱職正
官佐貳官黜降首領官負充吏役俱以九年通考黜陟
其雲南有司官負任滿給由一體考覈不稱職者黜降
緣係邊方具奏復任九年通考

一凡各處布政司按察司鹽運司首領官屬官從本衙
門正官考覈按察司首領官從監察御史考覈其餘衙

門並從本道按察司覆考其茶馬司鹽課提舉司正官至首領官并在外軍職文官任滿俱送本處布政司正官考覈仍送本處按察司覆考布政司官四品以上按察司鹽運司五品以上俱係正官佐貳官三年考滿由進牌別無考覈衙門從都察院考覈本部覆考具奏黜陟取自上裁

明令

凡各處府州縣官負任內戶口增田野闢為上所行事

蹟從監察御史按察司考覈明白開坐實蹟申聞以憑黜陟

凡各處任滿官負須要隨即將帶家小起離任所親費解由到省次日引見如到來當該房分不行引見問罪

事例

凡布政司堂上官咨送都察院考覈按察司官徑赴都察院投文考覈俱本部覆考首領等官河南道考覈本司覆考
洪武十七年令布政司按察司官年終來朝

將所屬官員考過堪用平常不堪用名數親自奏聞直隸府州官同 天順四年奏准管屯副使僉事考滿到部將任內該管屯田數目移文該部查理如果完結考作稱職不完考平常

凡南北直隸府州正佐官及衛首領官無上司所轄者考滿到部俱送河南道考覈牒回本司覆考係清軍者兵部稽考清解軍數管馬者兵部行太僕司稽考馬數管糧及帶辦商稅者戶部稽考有無拖欠俱待移咨到

日方准引奏 洪武二年詔府州縣正官三年一考課
吏部考覈黜陟佐貳及首領官在任三年所司具其政
績申達省部吏目典史在任者給由到京 三年奏准
府同知一考無過者陞知府知縣二考無過者陞知州
縣丞一考無過者陞知縣 十二年奏准兩廣所屬地
有瘴癘者有司俱以三年陞調雖係兩廣而無瘴癘者
仍以九年為滿福建汀漳二府湖廣郴州江西龍南安
遠二縣地亦瘴癘一體三年陞調 三十五年令有司

官三年考滿到部考覈稱職平常者俱復任九年通考不稱職者仍依例降用 宣德五年奏准天下官貢三

年六年考滿者俱令赴部給由所欠稅糧立限追徵九年考滿就便銓注任內錢糧完足方許給由 正統三

年奏准有司親民官貢考滿給由牌內開寫任前并任內逃民數目及招撫復業多少以憑黜陟 五年令在

外大小衙門官貢考滿除教職陰陽醫學外俱照洪武年間定制即便離職依限給由赴京考覈其牌冊內滿

後有開支俸管事者不准 十年奏准沿海收糧官員
三年考滿俱留辦事候九年通考赴部 弘治二年奏
准有司官雖不開稱職平常不稱職字樣其詞內有勤
能端謹者即以稱職論頗可者即以平常論誤事懶惰
者即以不稱論初考二考就與定稱否引奏復職三考
仍候行查定奪全無考覈詞語者行查差錯官吏俱照
例叅問 三年奏准雲南貴州布政司官除方面知府
外同知以下并軍職衙門首領官三年六年考滿許赴

本布政司給由其浙江等布政司并南北直隸府州縣等衙門官員三年六年俱赴部給由驛遞等官在外者赴本布政司南直隸者赴南京吏部俱造牌冊繳部北直隸者赴本部給由 又奏准給由官員歷俸或一百八箇月或一百一十箇月俱准九年考滿若多歷少歷者俱叅問少歷一月以上者問罪復除補任未及一月者若任內錢糧等項俱已完結亦照例問罪免其補轉考覈選用如有未完事件雖少歷亦令回任完結方許

給由 九年奏准凡天下司府佐貳官及州縣正佐并
衛所首領五品以下官員九年考滿到部考覈繁稱無
過陞二級有過并簡而稱職無過陞一級若繁簡平常
有徒杖罪或初次不給由者俱照例遞降定擬該陞該
降品級挨次選用若守候一年之上有願遞減選用者
比照從四品告願正五品事例除授職事仍給與該陞
服色俸級

凡行太僕寺卿丞考滿永樂三年命從都察院考覈吏

部覆考黜陟 八年奏准北京遼東陝西甘肅等處苑
馬寺卿丞等官依行太僕寺官例考覈主簿從本寺考
仍送都察院河南道考覈本部覆考其屬官監正監副
錄事止於各寺考本部覆考圍長三年考滿從本監本
寺官考覈闌茸不稱者送部黜降稱職平常者仍令在
任六年再考九年通考仍行兵部稽其所養馬數陞降
其九年考滿者先以缺申部候代官至方許給由

凡鹽運司判官永樂八年奏准依本司堂上官例考覈

凡考滿官吏在途病故正統五年奏准所在官司據其隨行親人具告即便差人相視明白給與堪信文憑遺下原贐牌冊批文就與轉繳

凡都察院理刑推官黜改知縣者雖品級相等不准通理刑部都察院司獄稅課司大使改除千戶所吏目亦不准通理

凡給由例限南直隸并浙江等布政司俱一年零二箇月北直隸八箇月

凡在外起送考滿官俱要合干上司查勘明白一一具結如無一處印信保結者行查

凡紙牌內不填小日不僉書不稱臣該吏背書不畫字稽勲司駁送本司紀錄年終類奏

凡公文批牌內不開除授到任考滿年月日期增減十歲以上戶口無新增俸月多厯少厯不開前任事蹟隱匿過名及紙牌不填字號漏用印信批咨申結內洗改為事丁憂患病痊可年月緊關字樣者俱叅問少厯者

復除補轉若增減不及十歲差錯籍貫出身除授復任年月日不署職背書該吏名缺不開報及丁憂起復復除共轉九年不開前後備細俸月者俱准改正

凡患病二年之上雖有文憑不准不及二年患帖無告官痊可月日亦不准

凡中途聞喪不將牌冊赴所在官司告繳及至起復之日方告繳者送問若中途被水火盜賊失落公文者行查

凡丁憂起復更調改除官貲前後兩任以十八箇月為半如前任日少許通理多則再歷三年不得以後任贍滿其歷過俸月於後考內通理

凡三年六年雖有專責差占必須一次給由違者送問仍照例考察繁稱有過者止陞一級簡稱及繁平常有過者俱本等用簡平常有過者降一級若有例前納米曾經繳報牌冊到部者不在此限其雲南所屬官三年六年不行赴本布政司給由不繳牌冊到部亦同此例

凡歷任六年止具三年事蹟給由者舊例叅問今准作
三年考滿亦不補造六年牌冊候九年考滿以六年事
蹟再造牌冊給由 弘治十五年令考察行太僕寺苑
馬寺官不必會同布按二司各寺官果有才行超卓者
一體推舉陞用又奏准在外衙門七品以上官有三年
或六年曾經到部考稱及任內曾有旌異例該陞擢自
願致仕者本部擬陞職銜或加散官服色令其致仕如
左右布政使無官可陞另行奏請定奪

右在外有司官

諸司職掌

一凡內外雜職官三年給由無私過未入流陞從九品
從九品陞正九品稅課司局及河泊所倉庫官先於戶
部查理歲課軍器織染雜造等局官送工部查理造作
花銷明白送部通類具奏其倉官收糧不及千石者本
等用虧折陪納足備者照依品級降用其有私筭者本
等用但犯贓私并私罪曾經杖斷未入流降邊遠從九

品降未入流不識字者本等用如有學無成效及罷閒生員除授雜職者犯賊私杖罪發在京衙門書寫

事例

凡倉庫司局等官俱行戶部查勘經收錢糧河泊所官行戶工二部查勘魚課織染局官行工部查勘段足鹽課稅課司局官行戶部查勘鹽課商稅在南京者俱由南京查勘明白起送赴部 洪武九年令倉庫司局管錢穀官以歷俸周歲為滿收受少者以數付交代官給

由多者以半俸支畢日給由雖經改除亦以九年通
論 十四年令各處倉官周歲考滿支俸給三分內
支一分支畢日未入流陞從九品已入流陞正九品
二十八年奏准內外倉官歷過全俸雖未周歲所收
糧數已滿千石遇有父母喪守制服滿後照起復官員
本等改用 又令內庫官一年為滿就將原收物件盤
與新官接管給由對品改用 永樂八年奏准順天府
廣備庫大使副使照內府庫官事例周歲為滿給由

正統元年奏准在京居賢等坊草場大使副使收草十萬束以上者陞一級不及數者本等用 又奏准山東都司所屬沿海倉官考滿守支盡絕給由布政司查理明白仍送原衙門照例給由 五年奏准司府州縣衛所考滿丁憂起復倉庫稅課司河泊所官將任內收過課程等項備開納獲通關字號及倉庫錢糧支銷明白餘剩物件交與見任官攢收掌支銷取具各該府州縣衛所官吏保結轉達布政司都司就令考滿官員親賫

赴京丁憂回還原籍者將首尾交盤明白亦將緣由申報本部候各官起復以憑查考 弘治五年奏准大同

宣府遼東甘肅等處各草場官俱以九年為期或八年前後遇例差官經盤堆垛如法數目不少准令起送

凡倉場官收糧千石草十萬束以上無過陞一級有笞杖罪本等用徒罪降用收糧不及千石草不及十萬束本等用有過降用係雜職降邊遠雜職內用若收糧不及千石草不及十萬束者歷俸週歲許交盤給由其在

大司宣府者守支盡絕其盤收前官糧草該減俸如支盡絕給由到任半年無糧收受者起送赴部行戶部查勘明白付文選司別用若初到之時雖曾盤收不係經收者亦起送其正糧守支盡絕即當減俸若守候二年之上放支不盡絕者仍聽全支本等俸給不及二年不許仍支全俸或守支間奉上司委署別衙門印信亦不許遷延過違年限丁憂復除或改除河泊所官千戶所吏目俸月不准通理違者皆送問

凡在京長安四門倉副使不係經收糧斛官員本等入選南京者具奏入選

凡在外河泊庫官鹽稅局織染局鹽倉茶鹽批驗所等官三年六年考滿係北直隸者赴本部考覈引奏復職係南直隸者赴南京吏部係布政司者赴各布政司查理明白就令復職各布政司仍將各官牌冊具本差人類繳候九年通考以憑查考若丁憂起復改除者前任少許通理多則不許通理違者俱送問多歷少歷違限

錯厯亦俱送問九年無過陞一級有過本等用

凡內外收糧經歷州判官吏目俱以三年為滿守支盡
絕給由到部送河南道考覈本司覆考具奏入選南京
所屬俱由南京河南道吏部考覈其有丁憂起復未經
南京衙門考覈者行查各衛倉經歷每衛止留一員收
糧斛其餘三年一替起送赴部俱以原職改除補輳九
年照依繁簡事例考覈黜陟任內收糧十萬石以上無
過考稱或平常俱陞一級不稱者本等用收糧不及十

萬石有過考稱或平常不稱俱本等用其守支年深與守支間丁憂起復例同

凡在京各衛倉經歷宣德四年奏准三年考滿者給半俸守支若糧不及千石照依倉官例交盤給由調用仍候九年黜陟

凡巡檢洪武初考滿給由無私過者陞正九品犯私笞者本等用杖罪降雜職二十五年奏定考滿捕獲軍囚盜賊等項二百名之上無私杖者陞一級有私杖對

品用一百名之上無私杖者對品用有私杖降雜職三十名之上無私杖者降雜職有私杖者降邊遠雜職不滿三十名者發邊遠充軍若有強賊及逃軍聚衆劫掠能擒獲以除民害者二十名之上無私杖者陞一級有私杖者對品用有私杖者降雜職九名之上無私杖者降雜職有私杖者降邊遠雜職若擒強賊逃軍六十名之上或止二十名而又能獲軍囚二百名之上及擒偽造寶鈔及偽印者具奏陞用 永樂元年巡檢考滿應

陞自陳不堪別用乞仍舊職者聽 正統六年奏准土

官巡檢三年六年攢造牌冊赴本布政司給由復職九

年通考赴部黜陟

凡沿海及土官巡檢俱不論軍囚無過本等用有過降

用盧溝橋張家灣白溝河通州北關漕縣楊村河西務

單家橋巨河小直沽河陽興濟緊要地方軍囚強盜俱

二名折一名成化間定巡檢考滿事例獲強盜三名至

九名軍囚不及一百名者無過降雜職有過降邊遠雜

職強盜十名之上軍囚百名之上無過對品用有笞杖
過降雜職徒罪降邊遠雜職軍囚二百名之上強盜二
十名之上有招或不及二十名或無強盜無過陞一級
有笞杖過對品用徒罪降雜職若獲成羣強盜二十名
之上或六十名之上又有招由軍囚二百名之上有事
由或不及無過陞一級有笞杖過對品用徒罪降雜職
若獲偽印一顆或二顆有覆造招由軍囚不論有無無
過陞一級有笞杖過對品用徒罪降雜職

凡巡檢三年考滿以新官更替日扣算例限府州縣掌印正官將任內捉獲軍囚等項從實查勘具結起送其沿海巡檢亦要畫圖貼說以憑查考若起送無府縣巡司保結軍囚公文止開起數不開花名或止開花名無籍貫并所犯事由強竊盜抄招無縣印鈐縫偽印不開是何衙門印信及令犯人當官覆造相同丁憂起復無本司關文及洗改軍囚姓名者俱行勘若公文不開事蹟洗改更替日月強竊盜軍囚總數者送問若考滿丁

憂起復前任歷少通理至一十八箇月之上另歷三年
凡驛遞開壩官舊制俱三年赴部給由惟雲南驛丞各
以三年一次赴布政司考覈九年通考然後赴部 宣
德四年奏准貴州所屬驛丞照雲南事例考覈 正統
元年奏准廣東所屬雜職衙門三年六年考滿照廣西
雲南例驛丞遞運所大使赴布政司考覈河泊稅課等
官仍舊 又奏准各處水馬驛丞及遞運所大使九年
將滿吏部預選官交代住俸管事新官至日方許給由

三年奏准驛遞開壩官直隸府州縣所轄三年赴部
其有布政司所轄三年赴布政司并按察司考察稱職
平常復職仍將各官牌冊年終類進九年赴部通考

五年奏准南北直隸驛遞開壩司獄等官三年赴巡按
御史考覈定與稱職不稱職考語連牌冊發有司收候
年終類繳九年赴部通考 景泰元年奏准南北直隸
驛遞開壩司獄等官三年六年考滿南直隸者赴南京
吏部北直隸者赴本部

凡驛丞九年考滿公文牌冊內事蹟不開報應付過使客備細花名起數者送問

凡驛遞等官丁憂改除前任日少許通理多則不許通理多歷少歷違限錯歷俱送問丁憂起復無印信關文者行查無過陞一級有過本等用弘治十四年令天下有司儒學巡檢倉庫驛遞等官考滿到部功蹟不足或有過名有願告退者照有司不稱職例各仍原職致仕

右雜職官入流倉官

收糧經歷附

諸司職掌

一凡各處府州縣學訓導與教官一體歷俸九年考滿給由其訓導給由到部出題考試將所試文字送翰林院批考通經者於縣學教諭內叙用若不通經旨本處復充訓導自來不通經者量才別用教官考覈稱職陞一等平常者本等用不稱職者黜降不通經者別用若承差考滿無私過於行人內用其犯私笞杖罪發行人司聽差一年無過陞用有贓私者發在京衙門充吏其

五軍都督府知印三年考滿於從八品內陞用六部知印三年考滿於九品內陞用

事例

洪武二十六年奏定考滿教官訓導以九年之內科舉取中生員名數為則定擬陞降縣學額設生員二十名教諭九年之內科舉取中生員三名又考通經者為稱職陞用若科舉取中生員二名又考通經者為平常本等用若科舉取中生員不及二名又考不通經者為

不稱職降黜別用州學額設生員三十名學正九年之內科舉取中生員六名又考通經為稱職陞用若科舉取中生員三名又考通經者為平常本等用若科舉取中生員不及三名又考不通經者為不稱職黜降別用府學額設生員四十名教授九年之內科舉取中生員九名又考通經者為稱職陞用若科舉取中生員四名又考通經者為平常本等用若科舉取中生員不及四名又考不通經者為不稱職黜降別用府州縣學訓導

分數生員一十名九年之內科舉取中生員三名又考
通經者陞教諭若科舉取中生員二名或一名又考通
經仍充訓導若科舉生員全無又考不通經降黜別用
又奏准教諭科舉及數考不通經有司內用科舉不
及數通經降訓導 三十五年命教授考通經任內止
有舉人三名者降學正 永樂元年欽定舉人署教諭
事者任內有科舉中式一名又有歲貢中式一名署訓
導事者有科舉中式一名或有歲貢中式一名俱與實

授 六年令教官考滿吏部同六科都給事中選其有才識者留六科理事一年後從本科都給事中考其高下用之 宣德五年重定舉人名數教授五名為稱職三名為平常不及三名為不稱學正三名為稱職二名為平常不及二名為不稱教諭二名為稱職一名為平常訓導一名為稱職不及者皆為不稱稱職者陞平常者本等用不稱者降 正統九年奏准教官九年任滿無舉人者試其學問果優仍任教官教授學正教諭俱

降訓導訓導調邊遠其不中者仍降雜職 弘治二年
奏准九年考滿教官考通經府州縣學舉人及數方陞
衛學并選貢衙門雖無舉人亦陞若丁憂復除者論前
後任多少若任府州縣學日多從府州縣學論任衛學
并選貢衙門學日多從衛學并選貢衙門論

凡教官考滿初場考四書本經義各一篇貳場論策各
一道教授學正教諭俱本部定中否訓導送翰林院定
中否考不通經係舉人出身者教授改吏目學正等官

改典史監生儒士出身者教授改稅課司大使學正等
官降河泊所官衛學并選貢衙門學官考不通經亦同
前例冒報舉人者送問無府州縣委官保結者行查雲
南各處教官從選貢衙門例亦不論舉人 十四年令
公侯駙馬伯家教書訓導九年考滿者比在外府州縣
學訓導例九年教無成效考中者於邊遠學校降用考
不中者於雜職內降用行國子監查無功蹟者革職為
民

右教官

諸司職掌

一凡內外入流并雜職應考官員任滿給由赴京本部
從實考校才能優劣依例黜陟果有殊功異能超邁等
倫者取自上裁

繁而稱職無過陞二等有私笞公過陞一等有紀錄徒
流罪一次本等用二次降一等三次降二等四次降三
等五次以上雜職內用

繁而平常無過陞一等有私咎公過本等用有紀錄徒
流罪一次降一等二次降二等三次降三等四次以上
雜職內用

簡而稱職與繁而平常同

簡而平常無過本等用有私咎公過降一等有紀錄徒
流罪一次降二等二次雜職內用三次以上黜降

考覈不稱職初考繁處降二等簡處降三等若有紀錄
徒流罪者俱於雜職內用

凡九年之內二考稱職一考平常從稱職二考稱職一考不稱職或二考平常一考稱職或稱職平常不稱職各一考者俱從平常二考平常一考不稱職從不稱職

一繁簡則例

在外府以田糧十五萬石以上州以七萬石以上縣三萬石以上或親臨王府都司布政司按察司并有軍馬守禦路當驛道邊方衝要供給去處俱為事繁府州縣田糧在十五萬七萬三萬石之下僻靜去處俱為事簡

在京衙門俱從繁例

事例

凡九年考滿官員永樂四年奏准各都司衛所布政司按察司行太僕寺鹽運司鹽課提舉司煎鹽提舉司市舶提舉司茶馬司考覈俱從繁例宣慰宣撫安撫招討長官司俱係土官衙門從簡例 八年令官員九年考滿給由初考稱職次考未經考覈今考稱職者初考次考不給由三考稱職者俱從稱職初考不給由次考稱

三考平常者初考平常次考不給由後考稱者俱從平常初考不給由次考平常三考不稱職者從不稱職

凡考滿官患病不滿三箇月及非緣事住俸月日不作實歷者叅問增減十歲以上考滿後非因公差摘占歷俸半年以上及不報前任事蹟并隱匿過名者俱送問弘治十三年令在外大小文職若九年已滿托故在任久住不行赴部及不申缺者叅提究問就彼放回原籍冠帶閒住

明會典卷十四

欽定四庫全書

明會典卷十五

吏部十四

諸司職掌

凡在京大小衙門及在外布政司并直隸府州縣吏典各以三年考滿給由其倉攢典以週歲為滿除稅課司庫局攢典考滿之日隨即交割明白給由府州縣倉攢典將經收糧斛支銷盡絕方許給由應有府州縣吏典考滿當即給由如布

政司府州縣過違一年直隸并在京過違半年給由到部俱送法司取問如不過違者隨付司封照依資格撥用

事例

洪武十七年議定吏員考滿試中第一第二等者於在京有出身衙門內用第三等者於在京未有出身衙門內用仍以等第姓名出榜曉諭遇缺以次撥用 二十六年奏准各衙門吏三年後滿於本衙門見缺令史書吏內陞用再歷三年給由赴京如有餘吏送付吏部不

許一槩縣陞於州州陞於府府陞於布政司等衙門及
王府長史司託故不給由者治罪 三十一年奏准吏
員考滿不給由丁憂不起復及侍親等項託故在閒已
經官府問斷仍充吏役者重歷三考 永樂十一年奏
准在外吏考滿照官員給由程限赴部若託故遷延者
問罪妻子同發北京充軍種田 二十年令吏典不給
由丁憂不起復得代不赴京赴京不著役者悉發保安
衛充軍 宣德三年奏准吏役滿擇其年五十以下堪

用者存留五十以上不堪用者俱罷為民有赦前在逃
能自首者仍令為民隱而不首事覺發隆慶州為民
七年勅諭吏員三考滿當授官者吏部通引於內府會
同六部都察院翰林院堂上官出題南北類試錦衣衛
堂上官監察御史六科給事中監試考其文義粗曉行
移得當書札不謬三事俱可取者為一等二事可取者
為二等三事俱不可取者放回民當差 正統元年奏
准在外吏役除為事月日明有文案許令補贍其患病

在家月日不補轉亦准實歷三年考滿三箇月內遇缺
許令陞補三箇月外雖有缺不准陞參六年給由違限
者問罪解京重歷給假省親祭祖送幼子還鄉違限等
項送問者俱不重歷 十二年奏准考滿吏歇役在家
過違例限不行給由或丁憂服滿起復違限或侍親親
終起復違限或丁憂起復不補原缺參補別衙門或託
故在閒年久復充吏役或一考多歷一箇月或給由起
送違限雖告有堪信文憑遷延二年之上或給由起復

到部將役內年月日期增減及多增五歲以上有規避者或丁憂少守制多守制一箇月或越關在逃行提解京者俱參問重歷或歷役一考或歷役未滿公差事完已滿一考或歷役一考滿為事回還或丁憂服滿起復及截替裁革吏本衙門有缺俱許三箇月以裏參補無缺起送合千府州縣查缺四箇月以裏參補又無缺起送本布政司查缺五箇月以裏參補其都司衛所吏典無缺起送該管有司查缺依例轉撥兩考給由但違一

年之上參補者參問重歷或為事歇役或者考滿為事歇
役俱以問結之日為始應還役者仍補原役轉歷兩考
已滿為事還役者俱照限給由違者參問重歷或為事
做工公差等項俱以問結事完工滿之日為始若遷延
一年之上着役者參問重歷其倉場攢典以守支盡絕
之日為始依例給由違者參問重歷 景泰二年奏准
在外吏兩考役滿止以實撥辦事月日為準丁憂月日
亦准實歷數內有省祭送幼子還鄉為事虛曠月日仍

撥補轅 五年奏准有過名吏公文吏冊開報不明者
先取親供結狀准收實撥冠帶仍行查勘但有隱匿貪
淫等罪例不出身者發隆慶永平等處為民 天順三
年奏准四川福建兩廣等處吏丁憂起復送幼子等項
及年四十五以上曾撥充南京當該者就行撥補及將
例前實撥當該三考滿日行南京吏部查理如無充當
隸兵及貪淫等項就行考試中者起送赴部奏請定奪
不中者就彼發回原籍為民 成化三年奏准吏員考

滿照宣德年間事例會官考選 七年令三考滿吏典
從吏部陸續考試不必會官仍照三等例行 二十三
年令吏典三考滿考試不中者給與冠帶閒住

凡在外一考吏滿無缺起送赴部者查無違碍付驗封
司撥補兩考

凡吏典給由例限南直隸并各布政司俱十四箇月北
直隸者八箇月違者送問

凡吏典一考役滿不轉參兩考役滿不給由展轉捏故

歇役三年之上者就彼問發為民中間雖有事故亦不准理未及三年者行查雲南吏典不行轉參給由者同其有接喪丁憂服滿遷延三年之上不起復者亦問發為民未及三年果有事故實跡查照定奪雖在三年之內起送過限到部者仍送問重厯

凡吏典給由赴部中途被水火盜賊失落原給公文雖告有所在官司文憑亦待行勘明白方許付撥若將批咨申文手本內緊關年月字樣洗改有跡或給批年遠

遇革不倒換新批者俱送問

凡吏典給由查無本處造到吏冊亦准驗封司暫撥辦事行勘無礙辦事滿日照例實撥倉場攢典例同

凡倉場攢典守支八年前役不盡者委官交盤明白交與見任官攢守支給由其批內不開守支盡絕年月日期及違限者送問曾經收放糧草者查照守支年分多寡免其辦事就撥當該全無收放者起送赴部駁回另
厯

凡在外輟補三考二考吏役內曾犯笞杖罪名不抄原問衙門招由繳部者不准收考

凡三考後滿吏考其法律立為三等通者為一等依資格出身其次為二等雜職出身不通者為三等給與冠帶放回原籍閒住

凡在外鹽運司及遇例納米等項吏典俱送戶部查理鹽課通關回報方許收考

凡戶兵二部書算九年考滿中一等者依資格出身二

等者雜職出身三等者冠帶閒住

諸司職掌

見教官項下

事例

洪武二十六年奏准在外承差於能幹人員內選取三年考滿役內無私過雜職內用有私過充吏役 正統元年奏准在外三司承差有缺於民間丁糧相應殷實之家選其才貌可用者縣申州州申府府申布政司覆勘相同方許收參有私過者充吏役保舉官員坐罪

凡承差役滿到部審實付文選司分撥各衙門辦事知
印役滿查明叅充年月日期收考奏請冠帶付文選司
分撥辦事但犯笞罪以上俱發充吏考滿不給由丁憂
不起復為事在逃遇赦者仍發重厯若役滿到部違限
隱匿過名多厯少厯增減年歲及批咨內洗改緊蘭字
樣俱查問

在外官員有政蹟者舊制許巡按等官奏舉其後又有
旌異之名今錄事例於後

憲綱

凡監察御史按察司官巡歷去處但知有司等官守法奉公廉能昭著者隨即舉聞

事例

凡有司官員政蹟卓異許各該上司奏保旌異以示激勸宣德十年詔府州縣官廉勤公正能恤民者親臨上司宜以禮待仍具其政蹟奏聞以憑旌擢成化七年奏准有司官員必待三年六年政蹟卓異方許薦舉

仍令吏部先察舉主舉者廉即用其人不必覆勘舉者
非人雖有政蹟亦必覆勘 弘治六年奏准各處巡撫
巡按并布按二司遇府州縣官才行俱優者無分歲貢
吏員出身一體舉保五品以上官員果有才德出衆者
開報本部奏請定奪

事例

凡在外有司官員果有政蹟深得民心者任滿去職許
令百姓保留 宣德八年奏准在外官員九年考滿凡

有保留者行所屬布政司按察司及直隸巡撫巡按官
覆勘

凡官員任滿考覈及朝覲考察各有定制若因事考察
間一舉行無常例具列於後

事例

正統元年奏准兩京五品以下官員從本衙門堂上官
考察如有不才及老疾者本部驗實具奏定奪國子監
教官禮部尚書及祭酒司業公同考察如無學行者送

部別用 景泰三年奏准六部等衙門堂上官考察各屬主事等官才力不勝者降縣典史老疾者冠帶致仕

天順八年奏准本部都察院會同內閣考察在京五品以下文職并在外布按二司官有不公者許令科道官指實劾奏南京各衙門照例考察有不公者令南京科道劾奏 成化四年令兩京文職堂上官曾經科道糾劾及年老不堪任事才德不稱職者各自陳致仕取自上裁五品以下官本部會同都察院及各堂上掌印

官公同考察年老無為貪淫酷暴者革職翰林院屬官并帶俸官譯字等官本院學士會同內閣考察 弘治元年令兩京五品以下官照例考察翰林院官亦從吏部考察其被黜之人有造言生事撫拾妄奏者發譴為民 十年令兩京官照例考察惟翰林院學士不在五品之例

凡考察京官每十年一次舉行不拘見任帶俸丁憂公差養病省祭等項俱公同本衙門堂上官考察

凡在外大小衙門官員考察洪武六年令監察御史及按察司察舉有無過犯具奏黜陟 永樂元年令府州縣官到任半年之上者巡按御史按察司察其能否廉貪之跡具奏 洪熙元年令考察布按二司官不職者降為縣官 宣德七年令各處巡撫侍郎同巡按御史考察方面官仍同方面官考察州縣官直隸府州縣從巡按御史考察 十年勅諭直隸府州縣從吏部差官及巡按御史考察各布政司府州縣從布政司及巡按

御史考察其布按二司堂上官從吏部都察院考察屬
官從巡按御史按察司考察 景泰三年勅都御史等
官考察天下有司官員 七年令天下府州縣官年老
殘疾罷軟不任事及貪酷生事科歛害民者許巡撫巡
按并按察司堂上官會同考其布按二司官聽巡撫巡
按官考察 弘治元年令考察罷閒官吏在京潛住有
擅出入禁門交結者各門官盤結拿送錦衣衛打一百
發烟瘴地面永遠充軍

官員事故具見諸司職掌各有事例若致仕舊隸稽勲司掌行今歸本司附載事例於後

諸司職掌

凡在京衙門及在外布政司并直隸府州縣官吏果有家屬干犯極刑除總麻疎遠異姓親屬不准外其小功已上親例合迴避開寫為因何事得何罪名係何衙門取問處決實跡親身赴京陳告以憑行移原籍及任所并原取問衙門照勘取具原籍官吏里鄰結狀并宗支

圖本及任所官吏保結明白以憑定擬奏准方許去官
離職

事例

洪武間凡官吏有小功已上親屬干犯極刑官於邊遠
叙用吏發邊遠軍衛衙門永充吏役 永樂元年令極
刑家屬官有才能本部明白具奏不拘例用 宣德七
年勅諭凡犯罪典刑者已屢經赦宥其子弟果有才行
文學聽保舉選用惟犯謀反大逆典刑者子孫不在選

用之例

諸司職掌

凡在京衙門及在外布政司并直隸府州縣官吏具告
老病殘疾劄付太醫院轉行惠民藥局委官相視明白
果成篤廢殘痼疾病分豁堪與不堪醫治明白具奏取
自上裁

事例

正統四年奏准年老廢疾官員不能動履者驗實取具

同僚官醫保結備申定奪 天順二年令御史不許養病省親 成化二年奏准内外文武官員患病三箇月之上俸糧截日住支御史如果久病勘實許還原籍調治 六年奏准各處巡撫巡按等官遇有司府州縣官員告稱老疾不堪任事者依例放回原籍不分大小俱類奏以憑揭黃作缺

凡告老疾官員年五十五歲以上者冠帶致仕未及五十五歲者冠帶閒住其考滿官員到部但年六十五歲

以上不得取選

凡兩京考滿官員到部年七十者例應致仕未及七十自陳老疾乞恩放回者堂上官本部覆奏定奪其餘行原衙門勘實具奏請旨在外各衙門官員給由起復等項到部奏告老疾者行順天府撥醫驗實通類引奏發落凡兩京見任官員并辦事進士乞恩養病者行原衙門勘實具奏請旨放回病痊之日赴部聽用仍行巡按御史并按察司查勘其在外方面有司官員不許養病

國初官員凡以理致仕者朝廷待以優禮與見任同又有陞秩給俸賜勅之典其後大臣致仕或給驛還鄉或命有司歲撥人夫月給食米有差其尤寵異者或賜勅或加賜白金文綺或又官其子孫皆特恩云

諸司職掌

見稽勲司

明令

凡內外大小官員年七十者聽令致仕其有特旨選用者不拘此例

事例

洪武十二年令内外文武官年老致仕者三品以上仍舊四品以下者各陞一等給與誥勅其愿事未及三年及為事降用或工役屯種取到者依本等職事致仕不給誥勅 十三年令文武官六十以上者皆聽致仕仍給誥勅 永樂十九年詔文官七十以上不能治事者許明白具奏放回致仕若無子嗣孤獨不能自存者有司月給米二石養其終身 宣德十年詔文武官年未

及七十老疾不能任事者皆令冠帶致仕免其雜泛差徭 成化元年詔文武官以理致仕五品以上者進階一級 四年詔聽選官員九年考滿該陞用者年力衰邁不能任事照該陞品級給與散官致仕 十一年詔給由考稱該陞及冠帶未任聽選官員有家貧親老疾病等項願告致仕者授以應該陞除職名以榮終身 二十二年詔在京文職以理致仕五品以上年及七十者進散官一階其中廉貧不能自存衆所共知者有司

歲給米四石

弘治四年奏准自告願退官員不分年

歲俱令致仕

凡九年考滿官員告致仕者考稱無過陞二級不稱有過原職致仕

諸司職掌

凡在京及在外府州縣官員除授之時投報供狀當即於簿內附寫歷仕脚色始末緣由或任內調除如有事故開附行止以憑稽考

事例

弘治十三年奏准文職官吏監生生員冠帶官知印承差陰陽生醫生但有職役者犯賊犯姦并一應行止有虧俱發為民其知印承差笞杖公罪充吏犯在革前重歷僧道官係京官具奏提問在外依律徑自提問受財枉法滿貫亦問充軍及僧道有犯姦盜詐偽逞私爭訟怙終故犯并一應賊私罪名有玷清規妨碍行止者俱發還俗若犯公事失錯因人連累及過誤致罪於行止

戒規無碍者悉令運炭運米等項各還職為僧為道義官
犯該行止有虧者革去冠帶不得行止者不革王府文
職因人連累并一應過誤律該笞杖罪名者議擬納鈔
贖罪還職不必解京就彼奏請發落若係希圖改調故
意犯贓有碍行止等項及犯該徒流以上者俱解京奏
請改調邊遠叙用重者從重論

諸司職掌

凡有在京衙門及在外布政司并直隸府州縣見任官

員但係兵刑等部都察院等衙門或因事提問等項問過應有的決紀錄公私過名開咨本部於紀錄文冊內明白附寫候九年通考以憑黜陟其有司官員三年考滿給由到部供報任內公私過名於冊內比查除上司未行知會紀錄罪名另行抄錄外有已行知會任內公私過名隱匿不報者議擬具奏送法司問罪

事例

洪武九年令諸司正佐首領雜職官犯公私罪應答者

贖應徒流杖者紀錄每歲一考歲終布政司呈中書省
監察御史按察司呈御史臺俱送本部紀錄 弘治元
年奏准內外各衙門問過官吏公私過名及罰俸等項
年終造冊類繳赴部送司以備稽考

國初令有司保舉人才即古鄉舉里選之遺意累朝下
詔亦必及之其事例備載於後

諸司職掌

凡各府州縣每歲於所轄隅廂鄉都內拔選容止端謹

無過人才一名申送布政司考覈轉行按察司覆考堪
充歲貢開坐考過詞語差人送部應有賢良方正及山
林巖穴隱逸之士并通曉經書儒士秀才孝廉俱各訪
求到官審無過犯違碍不拘名數差人伴送到部或內
外官員人等薦舉人材秀才即便行移原籍官司起取
赴部如儒士秀才出題考試果否通經賢良隱逸等項
人材量其才能定其高下仍取本戶丁糧數目作何營
生及戶內有無雜役事故供結明白然後開發選部選

用如將鄙陋不堪之人一槩朦朧濫舉原舉官吏依貢
舉非其人律問罪

事例

洪武十七年令各布政司直隸府州縣舉秀才人材必
由鄉舉里選知州知縣等官會同境內耆宿長者訪求
德行聲名著於州里之人先從鄰里保舉有司再驗言
貌書判方許進呈若不行公同精選者坐以重罪 三
十五年詔山林隱逸懷才抱德之士有司詢訪以禮敦

請赴京量才擢用其有志尚閒逸不願出仕者具名來
奏 永樂元年勅內外諸司文職官員各舉所知或堪
重任或沉滯下僚或可剗繁而優游散地或抱道懷才
隱居田里無問遠近並舉以聞 洪熙元年詔民間有
行己廉正才堪撫字者許見任官具實舉薦 宣德七
年詔各處文學才行出衆之士自二十五歲以上令所
在有司保舉赴京選用 八年詔各布政司按察司府
州縣官連名保舉賢良方正一人起送吏部量才擢用

正統十四年詔各處舉到儒士照永樂年間事例送翰林院嚴加考試選用不中者發原籍為民 景泰三年詔各處見任官員果有才行政事優長拘於資格屈在下僚及有文學才行堪授職任之士隱於民間及官貧罷職委無賊犯重情而才學可用者並聽在內四品以上官員在外巡撫巡按方面并各府州縣正官指陳實跡薦舉赴京考用所舉之人後犯贓罪連坐舉主 天順元年詔處士中有學貫天人材堪經濟隱居高蹈

不求聞達者所司具實奏聞 五年令天下有才兼文武或學行異等或謀勇出衆者許所在官司具實奏聞國初外官每年一朝洪武二十九年始定三年一朝之制以辰戌丑未年為期朝正後本部會同都察院考察奏請定奪其存留者俱引至御前刑部及科道官各露章糾劾怠職之罪一時譴責宥免皆出上命及宥免還任各賜勅一道以申戒飭云

諸司職掌

凡在外官員三年徧行朝覲其各布政司按察司鹽運司府州縣及土官衙門流官等衙門官一員帶首領官吏各一員名理問所官一員照依到任須知依式對款攢造文冊及將原領勅諭諸司職掌內事蹟文簿具本親賞奏繳以憑考覈各衙門先儘正官到任日淺佐貳官到任日久必先佐貳官來若係裁革未及二十里長州縣止設正官首領官各一員去處只令首領官吏來朝其程途遠近各量里路比照行人馳驛日期起程本

衙門速將起程月日申部遠者不許過期近者不許預先離職俱限當年十二月二十五日到京其來朝官員服色各照品級花樣及欽依今定樣製務要新鮮潔淨俱各自備脚力不許馳驛及指此為由科擾於民

明令

凡各處府州縣有司官員在任三年不許注代許令親將三載任內行過事蹟赴京朝覲如無規避依舊復任其佐貳官首領官一體三載來朝如一時勾當輪換前來

事例

洪武十一年令官員來朝察其言行功能第為三等稱職而無過者為上賜坐而宴有過稱職者為中宴而不坐有過而不稱職者為下不預宴序立於門宴者出然後退 十七年令天下諸司官吏來朝明年正旦各造事蹟文冊仍畫土地人民圖本俱以十二月二十五日至京其服色各以品級為差惟雲南遠在邊鄙特免其來 宣德五年令廉察朝覲官員貪污者發邊衛充軍

老疾鄙猥者為民其考滿月日已過者回任後將行過
事蹟造冊送合干上司依例考覈差人奏繳 正統九
年令廣西臨邊縣分係裁減衙門免其朝覲須知文冊
府州縣類進 十年令朝覲官員廉能著稱治行超卓
者賞衣服一襲鈔一百錠仍賜宴於禮部 天順四年

令朝覲官員才行超卓政績顯著者賜宴禮部仍賞衣
服一襲鈔一千貫老疾者致任罷軟無為者冠帶閒住
有贓者發原籍為民 成化五年奏准雲南長官司免

來朝州縣裁減去處止該吏一名賫文隨司府州縣官員進繳其各府首領官遇邊務差占亦免來朝 弘治六年令方面知府年老未滿罷軟無為非本部訪有實跡或有巡撫巡按止是一處開報并其餘官員到任未及二年非老疾貪酷顯著者俱留辦事且令朝覲之年先期行文布按二司考合屬巡撫巡按考方面年終具奏行各該衙門立案待來朝之日詳審考察如有不公許其伸理其科道官必待吏部考察後有失當方許指

名糾劾 八年奏准各處巡撫巡按會同從公考察布
按二司并直隸府州縣各鹽運司行太僕寺苑馬寺等
官賢否如無巡撫巡按會同清軍或巡鹽考察俱無巡
按自行考察其布政使按察使及分巡分守并知府知
州知縣并司寺正官各訪所屬官員賢否開具揭帖送
巡撫巡按以憑稽考其巡撫官當朝覲之年仍具揭帖
密報本部止據見任不謹名目不許追論素行其開報
官員若愛憎任情議擬不當本部都察院并科道官指

實効奏罪坐所由若被黜官員有不服考察撫拾妄奏者發遣為民

諸司職掌

凡諸司置立文簿將行過事跡逐件從實開寫承行發落緣由務要簡當每季差典吏一名依期覈赴本管上司查考布政司考府府考州州考縣務從實效除將勅諭事理令諸司進課官吏覈擎前去及行移布政司并直隸府州縣照依勅諭事理各置紅油木牌刊刻青字

於本衙門公廳上常川懸掛永為遵守每歲進課之時將考過事跡各賚赴京奏繳以憑通考若遇三年朝覲來朝官吏先將舊年春夏秋三季來考冬季事跡未完許於次年進課之時令該吏進呈毋得誑惑繁文因而生事科擾

事例

洪武二十三年勅方今所用布政司府州縣按察司官多係民間起取秀才人材考廉各人授職到任之後略

不以到任須知為重公事不謀體統不行終日聽信小人浸潤謀取賊私酷害下民以此仁義之心淪沒殺身之計日生一旦繫獄臨刑神魂倉皇至於哀告懇切奈何虐民在先當此之際雖欲自新不得可矣如此者往往相繼而犯上累朝廷下辱鄉閭悲哀哀父母妻子孰曾有鑑其非而改過也哉所有責任條例條列於後

一布政司治理親屬臨府歲月稽求所行事務察其勤惰辨其廉能綱舉到任須知內事目一一務必施行少

有頑慢及貪污坐視恬忍害民者驗其實蹟奏聞提問
設若用心提調催督宣布條章去惡安善儻耳目有所
不及精神有所不至遺下貪官污吏及無藉頑民按察
司方乃是清

一府臨州治亦體布政司施行耳目有所不及精神有
所不至遺下貪官污吏及無藉頑民布政司方乃是清
一州臨縣治亦體府治施行耳目有所不及精神有所
不至遺下貪官污吏及無藉頑民本府方乃是清

一縣親臨里甲務要明播條章去惡安善不致長姦損良如此上下之分定民知有所依巨細事務訴有所歸上不紊政於朝廷下不銜冤於滿地此其治也歟若耳目有所不及精神有所不至遺下無藉頑惡之民本州方乃是清

一若布政司不能清府府不能清州州不能清縣縣不能去惡安善遺下不公不法按察司方乃是清

一按察司治理布政司府州縣務要盡除奸弊肅清一

方耳目有所不及精神有所不至巡按御史方乃是清
倘有通同貪官污吏以致民冤事枉者一體究治

一此令一出諸司置立文簿將行過事蹟逐一開寫每
季輪差吏典一名賫赴本管上司查考布政司考府府
考州州考縣務從實效毋得誑惑繁文因而生事科擾
每歲進課之時布政司將本司事蹟并府州縣各賫考
過事蹟文簿赴京通考敢有坐視不理有違責任者罪
以重刑嗚呼今之布政司不挈所屬貪贓官吏又不申

聞闖茸不才諸等不公不法亦不究問府文到司並不審其為何但知遞送而已府亦以州文如此州亦以縣文如此自布政司至府州皆不異郵亭耳所以不治為此也

南京吏部

文選清吏司

事例

凡南京六部等衙門堂上正佐官皆缺洪武永樂以來

委給事中郎中等官署掌印信弘治十二年奏准如吏
戶禮兵工五部及通政司缺就於各衙門堂上官內推
舉一員三法司缺就於三法司堂上官內推舉一員署
掌仍將推舉過職名奏聞

凡南京各衙門新除復任官員吏部咨開職名到部各
取到任日期并各衙門繳到各官文憑收候年終類繳
吏部如遇丁憂者先行咨繳

凡南京大小衙門陞轉丁憂事故等項官員作缺到部

類咨吏部

凡南京各道御史有缺吏部咨送試職理刑等官到部
轉咨南京都察院分撥各道取到院日期咨吏部至試
職理刑滿日本院考過移文本部咨送吏部奏請實授
凡南京各衙門官員奏行給假省親本部劄送應天府
給引定限回任若違限一年半以上本部暫令到任管
事具奏請旨照例送問

凡南京法司送到還職官員係在京所屬送原衙門復

任直隸所屬具揭帖赴南京吏科填給文憑復任日期
繳報

凡南京各衙門官吏告送幼子還鄉行勘明白定限送
應天府給引照回

凡南京坐監監生不願出仕者具告到部行本監查勘
無碍照例擬授職名填註衙門給與散官奏令冠帶閒住
凡南京國子監呈送願就教職監生到部咨送吏部施
行

凡南京各衙門歷事監生舊例考過勤謹逐起差人具奏成化九年奏准本部案候每季通類具奏

凡南京各衙門寫本監生俱行本部轉行南京國子監取撥惟戶工二部徑自行取弘治二年奏准俱從本部取撥轉送

凡南京五府六部等衙門知印有缺本部咨吏部請旨點撥到部轉送該衙門着役三年役滿到部咨送吏部考試同九年周歲考滿官類奏

凡南京各衙門三考後滿吏典成化十一年詔免其赴京從本部照例考試中式者就令冠帶辦事不中者徑發為民二十三年詔考試不中者給與冠帶閒住

凡本部每季考過三考吏典一等二等冠帶分撥各衙門辦事滿日從七品出身者起送吏部聽選其餘俱給引照回原籍省祭三等冠帶閒住每年類奏

驗封清吏司

事例

凡南京文職散官每年正月以裏通行各衙門取勘歷任親供應請初授陞授加授散官類咨吏部具奏給授凡民瘼事每年正月九月十一月三次通類勘合行十三布政司并南北直隸府州如有蝗虫生發即行撲滅毋貽民患

凡本部編置各布政司直隸府州勘合紙張底簿書填盡日又復編置發行

凡南京各衙門辦事吏典弘治十年奏准大小二石辦

事半年大小一石并州所吏辦事一年方許實撥京考
若缺多照例以次陞叅

凡在京各衙門辦事已滿吏聽撥當該願告南京者吏
部咨到本部收附撥簿與南京各衙門應撥當該吏相
兼取用

凡南京各衙門老疾吏典行應天府撥醫看驗并告貧
難者取同鄉人執結是實給引放回為民

稽勲清吏司

事例

凡南京各衙門堂上官丁憂本部咨送吏部關領內府
勘合其餘官員就送南京吏科關填勘合給與若辦事
官吏監生俱送應天府給引照回守制按季開咨吏部
并南京都察院轉行原籍官司查勘

凡起復官吏監生到部扣算聞喪服滿年月日比對相
同其在京丁憂者查有類勘保結在卷辦事官監生付
文選司吏付驗封司查無類勘保結者仍付該司暫撥

行查在外丁憂吏典付考功司若有洗改咨批緊闕字樣者送問

考功清吏司

事例

凡南京各衙門官員考滿到部舊例三年六年九年起
送赴京應考覈者本部咨南京都察院考過咨送吏部
覆考景泰元年奏准例應考覈者從本部覆考連人咨
送吏部成化二十一年奏准六年者本部考覈類奏免

其赴京

凡應天府所屬在外六縣縣官學官三年六年九年考滿俱本府考覈詞語送本部咨送吏部

凡南直隸所屬司獄司稅課司局驛遞閘壩河舶等官三年六年考滿景泰元年奏准俱赴本部給由考覈復職行南京吏科填給文憑復任其牌冊差人類送吏部查考

凡南京各衙門願告致仕養病官員行勘明白具奏放

回

凡各處兩考役滿吏典永樂間定撥廣東廣西四川三
布政司分隸本部宣德十年奏准添撥江西南安贛州
二府福建漳州泉州二府湖廣永州辰州寶慶三府及
靖州正統五年奏准添撥湖廣常德長沙衡州三府并
郴州福建汀州興化二府弘治三年奏准添撥福建邵
武湖廣德安二府十年奏准添撥福建行都司并所屬
建寧左等五衛二十五所并武平等守禦千戶所

明會典卷十五